



# Baez Daih'it Saeg Buh

## 第一次洗衣服

贵港市覃塘区蒙公乡凌寺小学六(1)班 覃翠萍

Bohmeh dauqma gangj mbouj dingh lij haenh gou ne.

Hoeng, gou caengz saeg gvaq buhvaq, baenzlawz saeg ne? Gou sien aeu aenbat daeuj coux raemx, caiq dawz buhvaq cuengq roengz ndaw bat bae, yienzhaeuh aeu sijyihfwnj daeuj, aenvih daiq yungh rengz, raix ok haujlai sijyihfwnj, gou siengj gip hwnjdaej cuengq roengz ndaw daeh bae, hoeng sijyihfwnj youq ndaw raemx menhmenh yungz lo, gaenbonj dawz mbouj hwnj. Gou youq ndaw bat fou geubuh, raemx ndaw bat bienq

haujlai fugfauz, caemhcaiq yied daeuj yied lai. Sawqmwh gou siengj hwnj miz vunz gangj gvaq, sijyihfwnj dwk lai le, aiq sawj buhvaq cimq vaih. Gou lienzmuengz dawz gij raemx ndaw bat raix bae mbangj he, caiq gya raemx roengzbae. Gou yungh rengz fou buhvaq, fou dwk fwngz cungj hoengz lo, gou youh yungh ga caij, itcig saeg daengz mbouj miz fugfauz bae. Hoeng gou riuj geubuh hwnjdaej bae yawj, hozbuh caeuj genbuh vanzlij saeg caengz seuq. Gou geiq ndaej daxmeh bingzseiz saeg buh seiz, mbouj dwg

youq song giz neix lai dwk di sijyihfwnj ma? Gou couh ciuq gij fuengfap daxmeh youq hozbuh caeuj genbuh lai dwk di sijyihfwnj, caiq fou geij mbat, caiq aeu raemxsaw swiq, ya, caen seuq ha. Gou angq raixcaix, couh baez geu baez geu ciuq yienghhaenx saeg, mbouj geij nanz couh saeg buh liux lo, gou youh dawz buhvaq saeg seuq haenx bae dak youq gwnz saux.

Gou cingq dak buh, daxmeh guhhong dauqma lo, yawjraen gij buh dak youq gwnz saux, youh yawjyawj gou, daxmeh riu lo. Daxmeh naeuz: "Mwngz yawj mwngz dawz geuvaq mwngz loengh dumz lo." Gou ngaem gyauej baez yawj, caen dahraix, geuvaq gou ca mbouj geijlai cungj dumz lo. Daxmeh youh naeuz: "Vaiq rieg roengzdaej, gou bang mwngz saeg." Gou ngiengx gyauej naeuz: "Hw! Gou gag saeg."

(指导老师 庾景喜)

# Gou Gyaiez Dik Cuzgiuz

## 我爱踢足球

贵港市覃塘区蒙公乡凌寺小学五(1)班 覃奕

Gou gyaiez diyyuz yindung, lumj dwk lamzgiuz, dwk bingh-banghgiuz, buet ..... Hoeng ndawde gou ceiq gyaiez dik cuzgiuz.

Geiq ndaej baez daih'it dik cuzgiuz, dwg boux daeggo he heuh gou caeuj de itheij dik, aenvih gou mbouj rox gij fuengfap dik giuz, doeklaeng deng dik ndaej ga cungj in liux. Gvaqlaeng, doenggvaq gou genhciz lienh dik, bonjsaeh dik cuzgiuz gou couh ngoenz beij ngoenz ak lo.

Sawj gou ceiq nanzlumz dwg baez caeuj roek nienzgaep

doengzhag doxdax ndeu. Geiq ndaej baez haenx aenvih ban gou Cinz Hozlungz daiq yungh rengz dik, doeklaeng de lienz giuz daiq haiz dik haeuj aendou bouxwnq bae, sawj gyoengq doengzhag cungj riu ndaej dungx in bae.

Gawq gangj, ceiq caeux fatmingz cuzgiuz dwg Cung-guek, hoeng seizhaenx mbouj dwg heuh "cuzgiuz". Cuzgiuz seizneix dwg daiq Yinghgoz riuzok. Cienzgangj youq 11 sigij, Yinghgwzlanz caeuj Danhmwz miz ciengz hoenxcienq he, hoenxcienq sat le, vunz Yingh-

goz mwh cingleix dieg hoenxcienq, raen aen ndokgyaeuj vunz Danhmwz ndeu. Aenvih ndaenq lai, gyoengqde couh aeu ga bae dik aen ndokgyaeuj neix, gyoengq lwnyez he raen le hix daeuj dik, couh yienghneix, cuzgiuz seizneix okseng lo.

Moix baez caeuj daxboh yawj densi cuzgiuz doxdax, dingqnyi daxboh gangj aen guekgya lawz boux giuzyenz lawz gig ak, dangseiz gou couh geiq roengzdaej, hix ciemh-ciemh gyaiez yawj cuzgiuz doxdax lo. Moix ngoenz cuengqhag, cijaeu ndaejhoengq, doengzhag iu bae dik giuz gou cungj gig vaiq vuenh ndei haiz vuenh ndei buh, cung daengz cuzgiuzcangz bae.

Gou gyaiez dik cuzgiuz, aenvih de mboujdanh ndaej lienh ndangdaej, vanzlij daiq hawj gou angqyangz.

(指导老师:覃学廉)



# Duzmeuz Dwggyaiez

## 可爱的猫咪

贵港市覃塘区蒙公乡凌寺小学三(1)班 卢雯婷

Ranz gou ciengx miz duz meuz ndeu, bwn gwnz ndang miz hau miz henj, dwggyaiez raixcaix, gou an aencoh hawj de heuh "mihmih". Mihmih aen' gyauej luenzlili, de miz doiq lwgda ronghrikrik ndeu, baez daengz gyanhwnz laepngaungau, couh lumj song aen daengbau rox fatrongh nei, couhcinj duznou buet ndaej gig vaiq, hix deuz mbouj gvaq lwgda rongh de. De miz doiq rwz gig raez ndeu, sing baenzlawz iq de cungj dingq ndaej nyi. Seiq cik ga de mbaeumbwtmbwt, byaij loh cungj mbouj miz saek di sing.

Mihmih gawq dam ninz youh dam guhcaemz. Gyangngoenz daengx ngoenz cungj raen de ninz, gijmaz cungj mbouj guh. Danghnaeuz miz vunz byaij gvaq, de hix dwg hai da yawj mbat he, youh laep da ninz lo. Ninz gaeuq lo, couh ndwn hwnjdaej, ietiet hwet, ajaj bak, saenqsaenq ndang, couh byaijyotyot bae guhcaemz. Ndaw gyanghongh, gwnz veizciengz, gwnz donghaz sang, de cungj bae daengz. Couhcinj gwnz dingj ranzvax, de hix gamj youq gwnz byaij bae byaij dauq. Miz seiz lij daij gwnz sang diuq roengzdaej, hix mbouj lau in.

Mihmih gaeb nou gig ak. Baez dingqnyi sing duznou, couh sikhaek coemj gvaqbae, baez coemj dawz duznou, bak couh haeb, yaepda duznou couh dai lo. Seizneix ranz gou mbouj miz nou lo, neix cungj dwg goenglauz mihmih.

Duzmeuz ranz gou youh dwggyaiez youh gaeb nou ak, gou gyaiez duzmeuz ranz gou.

(指导老师:陆小媚)

# Baez Daih'it Loengh Nae

## 第一次玩雪

贵港市覃塘区蒙公乡高占小学三(1)班 黄茂晨

Saeh seiziq couh lumj baenz mbaw baenz mbaw mbawraeu ityiengh, mbin haeuj ndaw gwndaenj gou daeuj. Doek roengzdaej seiz, gou couh dawz de yo maemhmaenh bae. Seizneix, gou yo miz mbaw mbawraeu ceiq gyaueu ndeu, haenx couhwdg baez daih'it loengh nae.

2016 nienz hanzgyaj, miz ngoenz ndeu, mbwn ngamq rongh, gou couh dingqnyi sing yiengjdada. Gou hai da baez yawj, ya, yienzlaiz dwg nae doek youq gwnz conghcueng. Gou sikhaek fan ndang hwnqcong, gyoengq siujbaengzyoux gaenq youq baihrog caj gou lo. Gou caj mbouj gib cat heuj swiq naj,

longz geu buhmienz, couh buet ok ranz bae lo.

A! Baez daih'it yawjraen doek nae, hausaksak, couh lumj diengzhau nei, doek youq gwnz ranzvax, doek youq gwnz diegnywj, doek youq ndaw gehmieng, dauqcawq hausag-sag. Gou angqvauvau gop hwnj gop nae ndeu, nae youq ndaw fwngz iq gou unqnemnem gyoetgyatgyat. Gou youh gaem aeu gaem nae hung ndeu, baeuh daengz gwnz ndang gyoengqdoh bae. Gyoengq doengzdoh comz gvaqdaej, caeuj gou youq gwnz dieg nae dox baeuh nae, gyoengqdou buet bae buet dauq, singriu hihi haha cienz doh daengx mbanj.



Dou aeu nae cuengq hwnj gwnz civaiz henzde bae, youh diuqlengleng bae ra "diengz-hau" lo. Goengnax gou laeg-lemx aeu gij "diengzhau" dou cuengq gwnz civaiz haenx daeuj baenj baenz boux lwnyez biz-bwdbwd ndeu, aeu lwgmanh-hoengz guh aenndaeng, gwnz gyauej lij daenj aen mauhmong dem, ndei riu raixcaix. Dou dauqma yawjraen le, cungj vix duz "yakyawj" riuhaha hwnjdaej. Duz "yakyawj" lumj-baenz lix lo, cingq doiq gou riu ne!

Baez daih'it loengh nae, gij angqyangz haenx sawj gou nanzlumz.

(指导老师:韦江萍)